

YIPINDAR PABLO REMBICUACHIA CORINTO PNDAR UPE CORINTIOS

Pablo mahenduhasa Jesús reroyasar Corinto pndar upe

¹ Che Pablo, yande rivri Sóstenes reseve, oromondo co ore mahenduhasa opacatu p̄eu. Tūpa niha, güemimbotar rupi, che poravo apóstol che reco ãgua.

² Aicuachía co che ñehe p̄eu, pe Jesús reroyasar peñemonuha vahe Tūpa upe tecua Corinto ve. Pe-icua niha pe ipehapri peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri ãgua, in-ungar opacatu ambuae seroyasar co ivi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei.

³ Yande Ru Tūpa, yande Yar Jesucristo tape rovasa pe reco tupri ãgua.

Jesucristo suindar porovasasa seroyasar upe

⁴ Che, “Aviye ndeu” aheño ité Tūpa upe pe recocuer rese yepi. Esepia, Tūpa pe rovasa ité Jesucristo rese peicose.

⁵ Ëgüe ehi secocuer pipe sui Tūpa ombou opacatu pe reco tupri catu ãgua, pemombehu tupri vaheñã imbahecuasa, opacatu mbahe supi eté vahe cua tupri ãgua avei.

⁶ Esepia niha, ore co ñehesa Jesucristo resendar p̄eu imombehusa p̄ipe sui pe recuñaro uca ité.

⁷ Sese ndipoi eté que porovasasa Tūpa Espiritu suindar ipane vahe p̄eu yande Yar Jesucristo yev̄i āgua pesārose.

⁸ Tūpa niha pe moviracuaño itera pe rereco ari cañisa p̄ipe Jesucristo yev̄ise voi curi ‘tipo eme que mbahe t̄ei secocuer rese yuv̄ireco’ ohesave.

⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco āgua.

Jesús reroyasar p̄ihañemoñetasa ndahoyoyai vahe resendar

¹⁰⁻¹¹ Che riv̄ireta, che amombehu potami mbahe p̄eu yande Yar Jesucristo rer p̄ipe. Esepia, Cloé mu pe mombehu yuv̄ireco cheu: “Oñemoiro-iro yuv̄ireco oyeupe ae” ehi. Sese aipo ahe p̄eu: pemboyoya catu pe p̄ihañemoñetasa, ndapeyemboya-hoi chira peyesui. Peico catu pe yeaisusa p̄ipe. Ichui tahoyoya pe p̄ihañemoñetasa, tahoyoya avei mbahe pe remimbotar.

¹² Supi eté amove aipo, “Ore Pablo rupindar oroico” peye t̄ei; ambuae evocoyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye t̄ei aipo peico.

¹³ ¡Cristo rumo v̄ireco porombohesa ndoyahoyaho t̄ei vahe! ¿Che tie amano curusu rese pe angaipa repirã? anise, ¿che rer p̄ipe tie peñeapiramo uca peico?

14 ¡Aviye Tũpa upe che ndopoãpiramoise! Crispo iyavei Gayo, ahe güeraño rumo añapiramo yuvireco cuese.

15 Sese ndipoi chira “serer pipe ñapiramosa” ehi vahe yuvireco cheu.

16 Estéfnas rēta pendar avei añapiramo yuvireco, ipare ndipo iri revo ambuae ava añapiramo vahecuer.

17 Cristo niha nomombehui che poroãpiramo ãgua. Ēgüe ehi rumo che cuaita ñehesa ñepisirosa resendar mombehu ãgua tēi. Iyavei ndahei ñehesa yavai catu vahe aiporu. Esepia, nañomi potai eté que chñhi co ñehesa pĩratagüer Jesucristo curusu rese imano agüer resendar ava sui.

Cristo Tũpa pĩratasa, imbahecuaasa avei

18 Esepia, acoi ava ocañi tēi vaherã upe co ñehesa curusu rese Cristo manosa resendar aviye ěgüe ehi tēi vahe viña. Yande ipĩsiropri yaico vaherã upe rumo co ñehesa vireco ité Tũpa pĩratasa,

19 inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuaasa iyavei arocuara ava yaracua vai tēi vahe sui yaracuasa” ehi.

20 ¿Mara ehi evocoyase co ivi pipendar ava imbahecua vai vahe, ava-ava tēi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tũpa niha osecuñaro evocoi nungar mbahecuaasa ěgüe ehi tēi vahe pipe!

21 Ēgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ěgüe ehi tēi vahe” ehi tēi ava

yuvireco chupe viña, Tũpa rumo co ñehesa momba-husa sui 'toñepisiro che Rahir rese yeroyasa pipe yuvireco' oyapave yandeu.

²² Che mu judío osepia pota tẽi mbahe poromondiisa ipĩratá vahe iva pendar yuvireco. Griego evocoyase osendu pota tẽi ñehesa aracuasa resendar yuvireco no.

²³ Yande rumo, "Cristo omano curusu rese" yahe ava upe yaico. Amove judío upe mbahe tẽi co ñehesa. Iyavei amove ndahei vahe judío, co ñehesa osenduse, aviye acoi ãgũe ehi tẽi vahe yuvireco chupe.

²⁴ Yande rumo, Tũpa rembiporavo yaico vahe, que judío, anise que griego avei, yandeu co ñehesa Tũpa Rembiporavo Cristo resendar Tũpa pĩratasa ité, imbahecuasa avei.

²⁵ Esepia niha, ava upe, Tũpa suindar mbahe aviye acoi ãgũe ehi tẽi vahe viña. Co Tũpa suindar rumo mbahecuasa aviye catu vahe ité ava tẽi mbahecuasa sui iyavei acoi mbahe Tũpa suindar aviye nipiratai vahe ava upe viña, ahe rumo ipĩrata catu ité opacatu ava tẽi pĩratasa sui.

²⁶ Che rivireta, peyemomahenduha catu co rese: Tũpa pe poravo, yepe pe pãhu pendar ndasetaimi imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no.

²⁷ Evocoi ava, "Ndoicuai vahe mbahe yuvireco" ehi yuvireco pẽu viña. Tũpa rumo pe poravo evocoi ava imbahecua vai vahe mochi ãgua. Iyavei oiporavo ava pe pãhu pendar ndoicatu tuprii vahe yuvireco ava ipĩrata vahe Tũpa cuaparẽhi mochi ãgua.

28 Oiporavo avei co ivi pīpe ava remieroĩro seco mbegüemi vahe, ava seco ivi coti catu vahe pe pãhu pendar co ava seco ivaté vahe reroyi ãgua

29 ‘toyemboivate ai eme que ava che rovaque yuvireco’ oya.

30 Tũpa ité rumo yande mboyemboya Guahir Jesucristo rese, ahe avei ombou Guahir yande mboaracua ãgua, yande reco mohivi ãgua avei ‘toyuvirecoi cheu nara’ ohesave iyavei ‘ipĩsiropri toyuvirecoi’ oya yandeu.

31 Sese inungar aipo ehi ñehesa icuachiapri aracahendar pīpe: “Acoi ava oyeecomboivate ai pota vahe, toyecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

1 Iyavei, che rivireta, che asose cuese, añehese pẽu Tũpa suindar ñehesa supi eté vahe yipindar ndicuasai vahe pīpe, nañehei co ivi pipendar tẽi ava mbahecua pīpe, ñehesa ivate ai vahe pīpe avei.

2 Esepia, acoi aicose pe pãhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pīhañemoñeta vichico.

3 Iyavei ndachepĩratai, arirĩ avei che siquiyepave pẽu che sose.

4 Iyavei acoi añehese ñehesa pĩsirosa resendar rese pẽu, ndaiporui eté rumo ñehesa ivate ai vahe pe pīhañemoñetasa rerova ãgua. Che rumo Tũpa Espĩritu pĩratasa pīpe añehe pẽu

⁵ ‘toyeroya catu Tūpa pīratasa rese yuvireco’ che yapave pe yeroyaēhi āgua ava tēi mbahecuasa rese.

Tūpa oEspíritu pipe oicua uca mbahe yandeu

⁶ Ore rumo oromombehuño ité aracuasa pēu, pe peyemoviracua vahe Jesús rese pe yeroyasa pipe. Co aracuasa rumo aviye vahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaheerã.

⁷ Oroñehe catu aracuasa Tūpa suindar ndicuasai vahe rese, ahe yipive vireco vahe ivi apoēhi viteseve, ahe co omboyecua ramo vahe yandeu yaico vaheerã teco ori apirēhi vahesave.

⁸ Co ivi pipendar ava mborerecuareta rumo ndosenducuai eté co ñehesa. Osenducuae rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña.

⁹ Icuachiapri aracadendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihañemoñetaimi eté sese yuvireco no” ehi aracahe.

¹⁰ Tūpa rumo oicua uca Espiritu pipe yandeu cute. Esepia, Espiritu oicua tupri catu ité opacatú secocuer oico.

¹¹ Ēgüe ehi eté, inungar opacatu ava pãhuve ndipoí eté que ñepeí ava pihañemoñetasa oicua vahe, iespíritu güeraño ité oicua mbahe oime vahe ipiha pipe. Ēgüe ehi avei Tūpa Espiritu güeraño ité oicua Tūpa pihañemoñetasa.

¹² Yande evocoyase ndahei co ivi pipendar tēi espíritu yaipisi, ěgüe ehi rumo Espíritu Tūpa suindar yaipisi yaicua vaherã iporerecosa oporoaisusa pipe ombou vahe yandeu.

¹³ Ahe niha oromombehu Tūpa Espíritu ore mbohe vahe, ndahei ñehesa ava tēi aracuasa sui. Ěgüe orohe co supi eté vahe ñehesa Espíritu suindar oromombehu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opiha pipe, ndoipisii eté mbahe Tūpa Espíritu suindar yuvireco. Esepia, chupe evocoi mbahe aviye ěgüe ehi tēi vahe, iyavei ndosenducua catui eté yuvireco. Esepia, evocoi nungar mbahe senducuaasa Espíritu pipeño ité.

¹⁵ Acoi ava vireco vahe rumo Tūpa Espíritu opiha pipe oicatu opacatu mbahe cua ãgua. Ndipoi chira rumo ambuae ava ndovirecoi vahe Espíritu opiha pipe ahe ava recocuer cua tupri ãgua.

¹⁶ Esepia, icuachiapri aracahendar pipe aipo ehi: “¿Ava vo oicua tēira yande Yar pihañemoñetasa viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetasa.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tuprii Espíritu reroyasa pipe; pe rumo peguataño vite ava tēi pihañemoñetasa rupi peico. Sese namombehu catui ñehesa yavai vahe Espíritu suindar

pëu. Esepia, pe pītanimi nungar vite tēi pe pīhañemoñetasa Cristo rese.

² Sese che opombohe mbahe ndayavaimi vahe rese. Esepia, pītanimi ndoicatu vitei ocaru. Sese ocambu viteño tēi. Cūrītei rumo ēgüe peye vite ité. Esepia, pe ndapesenducua catu vitei eté Tūpa Ñehengagüer yavai vahe.

³ Peguata viteño co ivi pipendar pīhañemoñetasa tēi rupi. Esepia, peyemoecatēhi-tēhi oyeupe, iyavei peñemoiro peyeupe pe pīhañemoñeta ndahoyoyai vahesa pipe. Pe evocoyase peyapo ava ndoicuai vahe Tūpa rembiapo nungar.

⁴ Esepia, aipo peyeño tēi, “Ore Pablo rupindar oroico”; ambuae evocoyase, “Ore Apolos rupindar oroico” peye-peye tēi pe yembohesa rese pe yeecopisa pipe. Aipo ehi vahe pe pāhuve inungar ava Tūpa ndoicuai vahe pīhañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepeipei mboraviqui yandeu chupe yayapo vaheñã. Tūpa upe ore poraviquisa pipe sui niha peroya yande Yar peico:

⁶ che rane inungar añoti vahe mbahe rāhi pe pīha pipe; Apolos evocoyase inungar imboihusar; Tūpa rumo inungar omboori vahe pëu.

⁷ Evocoyase ndiyai peyeroya mbahe tīsar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rerecō.

⁸ Ore rumo oyoya tupri oroyapo mbahe pëu nara. Sese ñepeipei Tūpa omboura porerecosa pe rese ore poraviquigüer rupi oreu.

⁹ Ore oroporaviqui vahe Tūpa upe. Pe evocoyase ivi nungar peico Tūpa poraviqui āgua iyavei pe inungar Tūpa omopuha ramomi vahe oi peico.

¹⁰⁻¹² Che inungar oi apo cuapar oyapo rane vahe oi vīracua āgua, ēgüe ahe imombehu Cristo re-sendar ñehesa pēu seroya tupri āgua. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoyase inungar oi aposar omopuha vahe ivīracuasa harive, ēgüe ehi ahe pe monguerēhi catu pe mbohe co ñehesa rese. Evocoyase inungar oi aposar amove oiporu mbahe ipocopi vahe oi apo āgua yuvireco oro, guarepochi, anise ita aviye vahe. Amove rumo oiporu avei ndipocopi vahe mbahe que ivirape tēi, capihī, anise tacuar tēi oiguā yuvireco. Ēgüe ehi aveira pe mbohesar yuvireco. Ahe ñepeī-peī rumo iya oicua tuprira pe mbohe āgua yuvireco.

¹³ Ahe iporaviqui agüer rumo ari cañise icuasa tuprira ñepeī-peī yuvireco. Esepia, ahe ari pipe yande Yar oura tata reseve ñepeī-peī pe mbohesar poraviqui agüer cua āgua.

¹⁴ Acoi ava oporombohe tupri vahe inungar ava oyapo oi ndocai vahe, ahe oipisira oporaviqui repri;

¹⁵ ambuae oporombohe rai vahe rumo inungar oi oyapo ocai vahe tēi, iporombohe agüer opa tēi etera ocañi. Ahe güeraño evocoyase oñepisiro sāira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande piha pipe.

¹⁷ Oimese que ava yande pãhuve omomara vahe Tũpa rēta, Tũpa evocoyase omboura oñemoirosa ahe ava upe. Esepia, Tũpa rēta nimarai vahe ité; yande teieté niha Tũpa rēta yaico.

¹⁸ Peyembopa eme catu pe ae. Oimese que pe pãhu pendar oyeupe aipo “che yaracua tupri vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua ãgua.

¹⁹ Esepia, ava tēi aracuasa Tũpa upe ěgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tũpa upe yuvireco” ehi.

²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ěgüe ehi tēi vahe” ehi.

²¹ Sese ndapeyecomboivate ai chira que ava tēi porombohesa rupi peico. Esepia, opacatu mbahe pẽundar ité:

²² ěgüe ehi eté che Pablo, iyavei Apolos, Pedro avei, opacatu ivi pipendar mbahe Tũpa omoime vahe yandeu, tecovesa, manosa avei, yasepia vahe, iyavei mbahe oime vaherã, ahe niha opacatu pẽu nara,

²³ pe niha Cristo upendar, Cristo evocoyase Tũpa upendar secoi.

4

Apóstol yuvirecoi vahe poraviqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tũpa suindar ñehesa oyecua ramo vahe rese iporombohe ãgua” peyera oreu viña.

² Acoi vireco vahe ocuaitarã, iya ité omboyecua ocuaita mboaviye tupri sa.

³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu ãgua yuvireco. Che avei ndaicuai eté che recocuer cuapa tupri.

⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vahe rã pēu. Yande Yar rumo oicua.

⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesãro ranera rumo yande Yar yevi ãgua. Ahe niha omboyecuara opacatu mbahe ndoyecuai vahe, iyavei omboyecuapara ñepeipei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepeipei yandeu.

⁶ Che rivireta, che añehe cheyese ae, Apolos rese avei pēu mbahe tupri ãgua rese ‘ore recocuer sui toyembohe yuvireco Tũpa remimbotar icuachiapri rupi tupri yuvirecoi ãgua’ ore yapave pēu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu.

⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tũpa suindar. ¡Sese ndiyai peyecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe

remimbotar viña, ndoyavï avei nipanei vahe ité Tũpa suindar mbahe pẽu. Peyeupe revo ndoyavï mborerecuar guasu peico ore sui viña. ¡Ëgũe peye itera tarahu viña! Ahese, ore avei mborerecuar oroicora pe pãhuve viña.

⁹ Ore rumo apóstol oroico vahe ndoyavï cheu Tũpa ore renoi ipa tẽi vahe ore mano tẽi ãgua. Sese seroĩrombrï oroico inungar ava imboguaiprï yucapirã. Ëgũe orohe oroico opacatu ava rovaque, Tũpa rembiguai eta iva pendar rovaque avei.

¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavï ndaseco pĩratai vahe oroico ava rembiepiave; aheseve avei rumo peyecocomirata tẽi peico. Ore seroĩrombrï tẽi oroico, pe evocoyase ava pe mboetei guasu pe rereco yuvireco.

¹¹ Cũritei ore oroicove vite ité ore rieporeĩhi pipe, ore husei tẽi iyavei ndore turucuai eté. Ava rumo evocoyase mara-mara tẽi ore rereco yuvireco. Iyavei ndorovirecoi ore rẽta ité.

¹² Ore oroporaviquiño ité, oroyembogüerai tẽi ipipe. Ava rumo iñehe mara-mara tẽi eté yuvireco oreu; ore evocoyase oromboyeviño iñehe mbahe tupri pipe chupe. Ore reca-reca catuño ité ore momara ãgua yuvireco; ore rumo oroñemosañõ ité yuvireco chupe.

¹³ Iñehe-ñehe tẽi ore rese yuvireco; ore rumo saisusa pipe oromboyevi iñehe yuvireco chupe. Ore rereco itĩ nungar tẽi iyavei ore rereco inungar ava ãgũe ehi tẽi vahe yuvireco. Cũritei ãgũe ehi

viteño ité yuvireco oreu.

¹⁴ Ndahei pe mochi ãgua aipo ahe icuachía pëu, ãgüe ehi rumo pe mboaracua ãgua tõi. Inungar che rahir ité, che rembiaisu opovireco.

¹⁵ Esepia, yepe pereco ati pe pĩtĩvisar Cristo rese pe reco ãgua viña, ndaperecoi rumo setá pe yesupa. Esepia, che amombehuse niha ñehesa pĩsirosa resendar pëu, ahese ramo peroya Jesucristo. Seroyasa pĩpe evocoyase che inungar pe yesupa ité aico pëu.

¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pëu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi.

¹⁸ Amove oime pe pãhuve oyeecomboivate ai vahe. “Ndou iri chietera revo cohava yande repia” ehi yuvireco cheu viña;

¹⁹ aso pihaviño itera rumo pe repia yande Yar oipotase cheu. Ahese aicua tuprira oyemboivate ai vahe reco pĩratasa yuvireco. Ndahei chira ñehe güeraño tõi aicuara.

²⁰ Esepia, Tũpa omborerecuasave, ndahei oñehe pĩpe tõi oporocuai, opĩratasa pĩpe rumo ãgüe ehi.

²¹ ¿Mbahe pĩha peipota peico? ¿Peipota pĩha che aso vaheã pëu che ñehe pĩrata pe mboaracua ãgua mbahe pe rembiavi rese? Anise, pemoingatu rane pe recocuer, ahese asora mbahe tupri pĩpe pe pĩri.

Pablo oñehe ñepei Jesús reroyasar pãhu pendar oyemboaguasa vahe rese

¹ Ambuae mbahe, oroyandu ñepei mbahe tẽi pe pãhu pendar rembiapo oroico: oime aipo osi recoyar rese secoi vahe. Ahe angaipa guasu oyapo oico. Tũpa reroyasarẽhi ité ndoyapoi evocoi nungar mbahe tẽi yuvireco.

² ¡Pe rumo peyecomboivate ai peico! ¡Iyacatu rumo ndapeyemboivhai chira evocoi nungar mbahe tẽi repiase viña! Evocoi nungar ava iyacatu ité pemboyepẽira pe pãhu sui.

³ Yepe niha che teieté ndaicoi pe pãhuve viña, pe rese che mahenduhasa pĩpe rumo aicove ité pe pãhuve iyavei aicua voi eté aipo oyapo vahe mbahe tẽi recocuer inungar-ra aico vahe ité pe pãhuve viña.

⁴ Acoi peñemonuhase, che avei niha aicora pe pãhuve che mahenduhasa pĩpe, yande Yar Jesucristo pĩratasa avei secoira pe rese.

⁵ Evocoiyase ahe ava timondosa Caruguar povrive secocuerai mocañi ãgua. Ipĩpe sui iespĩritu oñepĩsirora yande Yar Jesucristo yevise curi.

⁶ Ndapeyecomboivate ai chira peico co mbahe tẽi oimese pe pãhuve. Esepia, peicua niha co ñehesa aipo ehi vahe: “Yepe chĩhimi imondosa pan mboapeposa panguã rese viña, ahe rumo oiquepa tupri panguã rese” ehi.

⁷ Evocoi ava rembiapo ai inungar pan mboapeposa pe pãhuve. Sese pemombopa pe pãhu sui peicoẽhi ãgua angaipa pĩpe peico vaherã inungar panguã ipiasu vahe ndovirecoi vahe omboapeposa oyese. Ëgũe peye ité niha. Esepia, yande Yar

Jesucristo iparaisu omano yande repirã. Êgüe ehi ahe inungar ovesa yucapri angaipa mocañi ãgua judío pieta Pascua pipe yepi.

⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacua vahe oyesui pan ipiasu, ndayapepoi vahe rereco ãgua, êgüe yahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momaramara tẽisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pẽu: “Ndapemborõi chira ava oyemboaguasa-guasa tẽi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tẽi oyerure vahe” ahe. Co che ñehesa rumo ndahei Tũpa ndoicua vitei vahe upendar. Esepia niha, pe yepepi ãgua ñepei reseve evocoi nungar ava sui, pesẽ itera co ivi pipe sui viña.

¹¹ Che niha aipo ahe icuachía pẽu: ndapemborõi chira que ava acoi “che Jesucristo reroyasar aico” ehi angahu tẽi vahe, que oyemboaguasase, anise oipota raise que ambuae ava mbahe, oyerogui tẽi vahe que mbahe rahanga upe, iyavei imahechiroi ai vahe, caguar tẽi vahe, anise imonda rai vahe. Evocoi nungar ava piri ñepei yepe ndapecarui chitera.

¹²⁻¹³ Cheu ndiyai eté ava ndoyuvirecoi vahe Tũpa rese recocuer rese porandu ãgua. Tũpa ahe ava yuvirecoi vahe recocuer opara oicua coiye. Pe rumo pe cuaita ité Tũpa rese yuvirecoi vahe upe pe porandu ãgua secocuer rese. ¡Sese pemboyepipiño ité osi recoyar rese secoi vahe pe pãhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pãhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evocoi mbia rembiapo ai rese porandu āgua! Iyacatu rumo Tūpa reroyasareta upe perasora secocuer moingatu āgua yuvireco viña.

² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoyase, ¿ndapeicatu pīha co tecocuer mbahemi tēi moingatu peico?

³ ¿Ndapeicuai vo yande avei yaporandura Tūpa rembiguai recocuer rese curi? Evocoyase, ¡peporandu catu itera co ivi pipendar tecocuer rese peyeupe yepi!

⁴ Perecose evocoi nungar mbahe tēi peyeupe, ¡mahera peiporu ava ēgüe ehi tēi vahe tūparo pendar upe mbahe moingatu āgua!

⁵ Che aipo ahe ité pēu pe chí āgua: ¿Ndipoimi eté vo pe pãhuve que ñepey yaracua vahe oicatu vahe que mbahe tēi peyeupendar moingatu āgua?

⁶ ¡Amove pevava peyeupe! ¡Ndahei co güeraño, oime avei pe pãhu pendar Tūpa reroyasar viraso ambuae omboetasa mborerecuar Tūpa reroyasarēhi upe tēi mbahe moingatu āgua!

⁷ Supi eté evocoyia pe reco pipe peyavi guasu ité. Iya peñemosañora co mbahe tēi pe mboetasa suindar upe viña. Ēgüe ehi eté, iya mbahe pe reco vahe, “Toñomiño yuvireco” peyera chupe pe

raso rãgüer sui Tũpa reroyasarẽhi mborerecuar upe viña.

⁸ Amove rumo pe avei peyapo mbahe-mbahe tẽi eté; peñomi avei pe mboetasa Tũpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tẽi aposar ndoyuviroiquei chietera Tũpa mborerecuasa pıpe curi! Peyembopa ucai rene chupe. Esepia, acoi ava oyemboaguasa-guasa tẽi vahe, mbahe rahanga upe tẽi oyerocuı vahe, omen-dasa sui oyemboaguasa vahe, cuimbahe pãve oyapo vahe mbahe oyese ae yuvıreco, imonda rai vahe, oipota rai vahe ambuae ava mbahe, osavaıpo serai vahe, imahechiroi ai vahe, iyavei ava vırocuı yesapıhaño tẽi vahe mbahe tẽi pıpe ambuae ava mbahe, ahe opacatu ndoyuvırasoi chira ivave Tũpa mborerecuasave curi.

¹¹ Oime avei niha acoi pe pãhu pendar yıpındar ěgüe ehi vahe yuvıreco viña, cũritei rumo opa pe angaipa imocañısa pe sui iyavei pe ipehaprı peico Tũpa upe nara ité. Ahe, “Peyavı mbahe” ndehi iri pẽu yande Yar Jesucristo rer pıpe iyavei yande Ru Tũpa Espıritu pıratasa pıpe avei no.

Yande rete ipehaprı Tũpa upe nara yaguasaẽhi ãgua

¹² Iyavei ambuae mbahe: Supi eté niha “avıye que mbahe che remimbotar ayapo vaherã” ehi vahe. Amove rumo co mbahe ndahei avıye vahe yandeu iyavei yandeu ndiyai evocoi nungar mbahe povrıve nara tẽi yande reco ãgua.

¹³ Supi eté niha aipo ehi vahe: “Yande rembihu yande avıter upe nara, yande avıter evocoiyase

yande rembihu upe nara” ehi. Coiye rumo Tūpa opara omocañi evocoi nungar mbahe. Yande retecuer rumo ndicuitai yaguasa tēi vaherã, ahe rumo yande Yar upe nara. Yande Yar evocoiyase yande retecuer upe nara secoi.

¹⁴ Inungar Tūpa ombogüerayevi yande Yar, ãgüe ehi aveira yande mbogüerayevi opĩratasa pĩpe coiye.

¹⁵ Peicua niha yande rete Jesucristo upendar ité. Ndiyai eté evocoiyase Jesucristo upendar yande rete mondo ãgua cuña güetecuer omondo-mondo tēi vahe upe.

¹⁶ Peicua niha pe aipo nungar cuña ndipihai vahe rese peicose, pe retecuer evocoiyase ñepe vahe nungar ité pereco. Esepia, icuachiapri arachendar pĩpe aipo ehi yandeu: “Yepe ñuvirío ava yuvirecoi vahe viña, ñepe vahe nungar ité rumo secocuer yuvireco” ehi.

¹⁷ Acoi ava secoi vahe rumo yande Yar rese, ahe secocuer evocoiyase ñepeño ité.

¹⁸ Peyepipi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoiyase omomara catu güembaliapo pĩpe sui tēi.

¹⁹ ¿Ndapeicuai vo pe retecuer Espiritu Santo upendar ité secoi, iyavei ahe Espiritu Tūpa remimbou pe rese ité secoi? Sese pe retecuer ndahei pēundar ité.

²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe aviyeye vahe pe retecuer pĩpe Tūpa mboetei ãgua.

7

Poromboaracuasa mendasa resendar

¹ Cũritei amboyevíra pẽu acoi cuese pe porandusa mendasa resendar peicuachía vahe ímbou cheu. Avíyeño ité niha que ava ndomendaise viña.

² Pe aguasa-guasa tẽiẽhi ãgua rumo peyacatu perecora pe rembireco, cuña avei evocoyase tovireco oyacatu omer yuvireco.

³ Cuimbahe tomboaviye omendasa güembireco rese iyavei cuña omenda vahe, tomboaviye avei mendasa omer rese. Ahe niha yande cuaita yamendase.

⁴ Esepia, cuña omenda vahe güetecuer ndahe iri oyeupe nara víreco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara víreco, ahe rumo güembireco upe nara ité víreco.

⁵ Ndiyai peatẽhi oyeupe. Oyoya rumo, “Yayapo eme mbahe” peyese peyeupe pe yeroqui ãgua Tũpa upe, ahe avíyeño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Carugar pe ãtoi tiẽtera.

⁶ Ndahei che opocuai ‘tomenda yuvireco’ viya pẽu.

⁷ Che rumo aipota che nungar pe mendaẽhi ãgua viña. Tũpa rumo ombou yande yacatu yande recorã.

⁸ Iyavei ndomenda vítei vahe upe, cuña imer mano vahecuer upe avei amombehu pota mbahe: iyacatu revo ndapemendai peico che nungar.

⁹ Ndapeicatuise rumo pe ñemosa ãgua, pemendaño. Esepia, avíye catu itera pemenda poropota rai rãgüer sui.

10 Che rumo amombehu omenda vahe upe 'topoi eme cuña omer sui' viya. Ndahei cheyesui tēi aipo ahe. Ahe rumo yande Yar porocuita ité.

11 Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

12 Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoyase ahe topoi eme ité güembireco sui.

13 Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoyase ahe cuña topoi eme ité ichui.

14 Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tūpa rovaque. Ēgüe ehi aveira cuimbahe Jesús reroyasar virecose güembireco Jesús reroyasarēhi. Ēgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tūpa upendar yuvirecoira.

15-16 Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoiño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoiño avei ichui. Esepia, Tūpa

oipota mbahe tupri pipe yande reco ãgua.

¹⁷ Co rumo mbahe: peicoveño yipindar pẽu Tũpa ombou vahe rese seroyaẽhi vitesendar pipe. Ahe aporocuai opacatu Cristo upendar ñemonuhasa rupi yepi.

¹⁸ Acoi Tũpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco ãgua.

¹⁹ Esepia, ndahei chira que judío, anise que ndahei vahe judío yaicose aviye catura yaico. Co rumo Tũpa oipota catu, “Tomboaviye opacatu che porocuaíta amondo vahe chupe yuvireco” ehi yandeu.

²⁰ Sese peicoveño peyacatu pe recocuer pẽu Tũpa ombou vahe rese pe renoiẽhi vitesese.

²¹ Pe mbiguai tẽi peico vahe pe renoise Tũpa, pepihañemoñeta etepri eme evocoiya pe recosa sui pesẽ vaheerã rese. Peicatuse rumo, peyepipiño itera ichui.

²² Esepia, yepe pe mbiguai tẽi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tẽi peico vahe, yepe ãgüe peye viña, peroyase rumo Cristo, ahese sembiguai peico.

²³ Tũpa upe rumo perepí iteanga, sese ndiyai eté ambuae ava povrive tẽi peico.

²⁴ Sese, che rivireta, peicoveño itera pe recocuer pipe inungar yipindar Tũpa pe renoise.

²⁵ Cuñatai ndomenda vitei vahe resendar rese rumo ndarecoi Yar suindar che ñehe ãgua. Che rumo amondora che pihañemoñetasa yuvireco

chupe. Esepia, yande Yar che paraisuerecosa pïpe imboyeroyapri aico.

26 Cheu aviye catuño ité ndomendai vahe ãgüe ehiño tãise yuvireco viña. Esepia niha, tecocuer yavaí eteanga cãritei.

27 Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe.

28 Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavaí catura co ivi pïpe yuvireco chupe. Sese che ndaipotai evocoi nungar mbahe pïpe yuvireco vaherã.

29 Che rivireta, aipo mbahe amombehu pota pëu: ndipucuvei co ari naporai vahe yepota ãgua yandeu. Sese co pïpe suive tupri omenda vahe toyuvirecoi ndomendai vahe nungar yande Yar rese opihañemoñetasa pïpe.

30 Acoi ndovihai vahe, toyuvirecoi eme oviharẽhisa pïpe iyavei acoi oviharete vahe, ahe toyuvirecoi eme avei oviharetasa pïpe, iyavei vïrocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pïpe.

31 Acoi ava ipihañemoñeta catu vahe co ivi pïpendar mbahe poru ãgua, tipihañemoñeta eme evocoi nungar mbahe tãise rese yuvireco. Esepia, co ivi pïpendar mbahe yasepia vahe, ocañi tãira.

32 Che ndaipotai co ivi pïpendar recocuer rese tãise pe pihañemoñeta etepri peico. Acoi mbia ndomendai vahe rumo, ipihañemoñeta catuño ité yande Yar rese imbovïha ãgua;

33 omenda vahe rumo ipihañemoñeta avei co ivi

p̄ipendar recocuer rese t̄ei, güembireco mbov̄iha ãgua rese avei.

³⁴ Evocoyase ndahei ñepei op̄ihañemoñetasa vireco. Ëgüe ehi avei cuña op̄ihañemoñeta rereco; cuña ndomendai vahe, ip̄ihañemoñeta yande Yar upendar mbahe rese, güetecuer iyavei oesp̄iritu rereco tupri ãgua Tūpa upe. Cuña omenda vahe rumo ip̄ihañemoñeta co iv̄i p̄ipendar recocuer rese t̄ei omer mbov̄iha ãgua oico.

³⁵ Che aipo ahe p̄eu ‘mbahe tupri pipe toyuv̄irecoi’ viya, ndahei mbahe yavai vahe pipe pe reco ãgua. Che aipota ité pe reco catuprīsa pipe yande Yar upeño ité mbahe peyapo vaherã pe recoeté pipe peico.

³⁶ Acoi ava ip̄ihañemoñeta vahe güembirecov̄i rese omenda ãgua, “Aviyeteramo ayav̄ira mbahe ichui iyavei niha osupit̄i ité imenda ãgua, sese aviye catu yamenda” ehise, toyapoño güemimbotar. Tomendaño ité güembirecov̄i rese. Esepia, mendasa niha ndahei angaipa.

³⁷ Acoi mb̄ia rumo ndov̄irecoise que ocuaita omenda ãgua iyavei oicatu ité güemimbotar apo, ip̄ihañemoñetase ñepei reseve güembirecov̄i rese omendaēhi ãgua, ahe aviyeño ité.

³⁸ Evocoyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepī ãgua omer sui imanoēhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara.

⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tūpa Espíritu suindar.

8

Pablo oñehe tembihu mbahe rahanga upe tēi seropovēhepri rese

¹ Cūritei ambuae mbahe amombehura pēu mbahe rahanga upe mbahe mimba yucapri seropovēhepri rese. Supi eté aipo ehi vahe: “Yande opacatu yareco yande mbahecuasa” ehi. ¡Yande rumo, “Aicua tupri opacatu mbahe” yande hesa pipe yayeecomboivate ai tēi! Yayeaisuse rumo, ahese yañepitivii catu Cristo reroya tupri ãgua.

² Supi eté yande, “Che aicua ité co mbahe” yahe tēise que mbahe upe, ipane vite ité rumo icua tupri ãgua yandeu.

³ Yande rumo yasaisuse Tūpa, ahese Tūpa, “Co ava cheundar ité secoi” ehira yandeu.

⁴ Evocoiyase co mbahe rahanga upe tēi seropovēhepri mbahe mimba yucapri hu ãgua rese añehe. Yande niha yaicua co mbahe rahanga ãgüe ehi tēi vahe co ivi pipe, iyavei oime ñepei güeraño ité Tūpa.

⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei).

⁶ Yande rumo yaicua ñepeiño ité Tūpa oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepei vahe, ahe Jesucristo. Ahe ichui oime opacatu mbahe, ichui avei yaicove.

7 Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovêhepri, ipihañemoñeta, “Co mbahe roho tûpa rahanga upe seropovêhepri” ehi viteño yuvireco oyeupe. Ipipe sui omomara uca Tûpa rese opihañemoñetasa yuvireco.

8 Supi eté tembihu ndayande pĩtívii Tûpa rese yaico vaherã. Ndahei mbahe roho husa pipe sui tẽi avıye catura yaico iyavei ndayahuisse, ndahei chira mbahe tẽi catu yaico.

9 Pẽu niha avıyeño pehu viña; peicua catura rumo, avıyeteramo que Jesús reroyasar ndoicatu tupri vitei vahe pemboangaipa ucara.

10 Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, avıyeteramo pemonguerẽhi aveira ihu uca ãgua chupe.

11 Evocoyase co pe mbahecuasa pipe pemocañi uca yande rivri Tûpa rese noviracua tupri vitei vahe peico. ¡Cristo rumo omano ipĩsiro ãgua!

12 Esepia, pemomarase Tûpa rese ipihañemoñetasa, ahese pe ae peyemboangaipa uca Cristo amotarẽhisa pipe peico.

13 Sese yande mbahe roho husa pipe sui yamboangaipa ucasa yande rivri viña, ndayahu iri chiltera evocoi mbahe roho yande rivri mboangaipa ucaẽhi ãgua.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe p̄isi ãgua viña. Esepia, che apóstol aico. Supi eté che asepia yande Yar Jesús iyavei che porav̄iquisa p̄ipe sui niha peroya yande Yar peico.

² Yepe, “Pablo ndahei apóstol” ehi ambuae ava yuv̄ireco cheu viña, pe rumo, “Ahe co secoi” peye voiño itera cheu. Esepia, che remimombehu p̄ipe sui niha yande Yar peroya peico. Ip̄ipe sui avei icuasa tupr̄i apóstol che recosa p̄ẽu.

³ Ahe ñehesa amboev̄i tupr̄i ava che recoãha potasar upe yuv̄ireco yepi.

⁴ Iya ité che remihura p̄isi, che iguarã avei pe sui viña.

⁵ Iyavei inungar ambuae apóstol viraso ité güembireco oyeupi yuv̄ireco yepi, Jesús r̄ivireta avei ãgüe ehi yuv̄ireco, ãgüe ehi avei Pedro, ãgüe ahe aveira niha che viña.

⁶ ¿Ore güeraño tie Bernabé rese oroporav̄iquira ambuae mbahe rese ore recove ãgua?

⁷ Esepia, sundao nomboep̄i sundao güeco ãgua, ahe rumo oporav̄iquisa rep̄r̄i oip̄isiño. Iyavei ava uva t̄isar, ahe avei yav̄iyese, ohu güemitiḡuer. Iyavei ovesa r̄ãrosar, ahe avei omohe ovesa cambi igua.

⁸ Che ndahei cheyesui t̄ei aipo ahe p̄ẽu. Esepia niha, Moisés porocuaita p̄ipe avei aipo ehi yandeu:

⁹ “Pemondo eme tiv̄i yuru rese mbahe icaruẽh̄isa mbahe r̄ãh̄i oicambese yuv̄ireco p̄ẽu”

ehi. Supi eté co Tũpa aipo ehi vahe ndahei tĩvi upeño.

10 Yande reco tupri ãgua rese niha aipo ehi yandeu. Esepia, acoi ava omonguhi vahe ivi iyavei acoi oicambe vahe mbahe rãhi, oyoya osãro mbahe oipisi vahe rã oporaviquisa sui oyeupe nara yuvireco yepi.

11 Evocoyase ore avei oroñoti Tũpa Ñehengagüer pe piha pipe ore pe mbohese. Sese aviyeño aveira oroipisise mbahe pe sui oreyeupe nara viña.

12 Esepia, ambuae oicatu mbahe pisi ãgua oyeupe nara yuvireco pe sui. Evocoyase ore avei niha orocatu mbahe pisi ãgua pe sui ore poraviquisa pipe viña.

Ore rumo ãgüe ndorohei eté. Esepia, ore oroñemosañõ ité 'tiñehe mara eme co ñehesa Cristo resendar rese yuvireco' ore yapave.

13 Pe niha peicua ité acoi oporaviqui vahe judío tũparove, ichui ocaru yuvireco. Esepia, yuvirohu mbahe roho Tũpa upe seropovẽhepri tũparo rocarve yuvireco yepi.

14 Ëgüe ehi avei yande Yar ore cuai 'toipisi mbahe ipane vahe co ñehesa mombehusa pipe sui yuvireco oyeupe' oyapave oreu.

15 Che rumo ndaporandui eté mbahe pe rembiereco rese vichico pẽu yepi. Ndahei 'tombou mbahe yuvireco cheu' che yapave aipo aicuachía imondo pẽu. Che rumo evocoi nungar mbahe rese ayembovihañõ ité. ¡Yepe che yucapri tẽira tieporẽhi viña, ndaporandui chietera rumo mbahe rese pẽu! Esepia, namocañi potai eté co che yembovihasa cheyesui.

16 Che rumo amombehuse co ñehesa pĩsĩrosa resendar ava upe, ndiyai ayeecomboivate ai ipipe. Esepia niha, che cuaita ité yapo ãgua iyavei, ¡cheparaisu itera ndamombehuse ava upe co ñehesa viña!

17 Tũpa ndache cuaise oñehe mombehu ãgua viña, che rumo che querẽhisa pĩpe amombehuse, ahese aipisira Tũpa suindar porerecosa. Ëgũe ndahei rumo. Esepia, Tũpa che cuaisa pĩpe niha amombehu.

18 Ndaporanduisse mbahe rese pẽu amombehuse co ñehesa pĩsĩrosa resendar, ipipe ayembovihaha ahe che vihasa porerecosa nungar cheu. Yepe aicatu mbahe rese che porandu ãgua viña, che rumo ãgũe ndahei eté.

19 Yepe che ndahei ava povrive tẽi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iquerẽhi vahe Cristo reroya ãgua’ che yapave.

20 Esepia, aicose judío pãhuve, secocuer rupi aicoveño Yar upe imonguerẽhi catu ãgua yuvireco. Ëgũe ahe ité, aicose ava Moisés porocuita povrive yuvirecoi vahe pãhuve, che avei eté mborocuitavrive nungar aico. Ndahei rumo Moisés porocuita povrive ité aico imboaviye ãgua.

21 Iyavei ava ndoyuvirecoi vahe Moisés porocuita povrive, ipãhuve aicose, inungar ahe yuvirecoi, ãgũe ahe tupri avei imonguerẽhi ãgua yande Yar upe vichico. Ndahei rumo Tũpa porocuita mboyeroyaẽhisa pĩpe aico. Esepia, Cristo porocuitavrive che recocuer.

22 Iyavei no, aicose ava yande Yar ndoviroya

tupri vitei vahe pãhuve, secocuer nungar tupri avei aico Yar upe imonguerẽhi catu ãgua. Êgüe ahe opacatu ava upe 'toñepisiro catu ahe avei yuvireco' viya.

²³ Che ayapo co opacatu mbahe 'taseta catu co ñehesa pĩsirosa reroyasar yuvireco' che hesa pipe, 'taipisi avei co porovasasa oime vahe co ñehesa reroyasa pipe' che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoyase inungar co ivava catu vahe, êgüe peye avei pe recocuer pipe Tũpa porerecosa pisi ãgua peico.

²⁵ Iyavei opacatu oyemoingatu vahe oguayi ãgua oñearo tupri opacatu mbahe tẽi sui oyemomaraẽhi ãgua yuvireco. Ahe êgüe ehi porerecosa ndipocopi vahe pisi ãgua tẽi yuvireco. Yande rumo yayemomborarara porerecosa apirẽhi vahe pisi ãgua yaico.

²⁶ Evocoyase che avei, ndahei ava oyahuva-huva tẽi vahe nungar aico Tũpa remimbotar apo ãgua iyavei che ndaicoi ava iguayi tẽi vahe nungar.

²⁷ Che rumo mbiguai nungar che retecuer areco, amboyeroya uca pihañemoñeta tupriisa upe. Esepia, ndaipotai ambuae ava mbohe pare imombopri tẽi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemomahenduha vitera aracahe yande ramoi

guatasa rupi mbahe pĩtu Tũpa imboguata agüer rese. Iyavei para guasu Pĩra vahe avei osasa opacatu yuvireco aracahe.

² Ēgüe ehi eté opacatu oguatase mbahe pĩtuvri rupi iyavei para guasu osasase yuvireco, ndoyaviĩ ñapiramombri yuvirecoi Moisés recocuer rupi uguata ãgua aracahe.

³ Iyavei oyoya guasu yuvirohu tembihu Tũpa ombou vahe chupe nara yuvireco,

⁴ opacatu guasu avei oihu ita sui Tũpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco.

⁵ Yepe ěgüe ehi Tũpa opacatu yande ramoi judío upe viña, setá iteanga rumo ava ipãhu pendar ndahei aviye vahe ipiha rupi yuvireco. Ipipe sui opa omano ivi iporupirẽhisa rupi aracahe.

⁶ Co opacatu mbahe sembiapogüer yuvireco ahe yande mbohe ãgua ‘toipota rai eme mbahe-mbahe tẽi inungar ahe ava yuvirecoi’ oyapave yandeu.

⁷ Sese yande ndayamboetei chira mbahe rahanga tẽi, inungar ahe ipãhu pendar yuvirecoi aracahe. Aipo ehi eté niha icuachiapri araca-hendar pipe: “Co ava ocaru vahe, yuviroihu avei yuvinoi. Ichui yuviropũha, oyembovihaño pieta apo yuvireco” ehi.

⁸ Ndayayemboaguasa-guasa tẽi chaveira inungar ahe amove ěgüe ehi yuvireco. Ipipe sui tẽi ñepeĩ ari pipe ahe opa omano veintitrés mil tupri yuvireco aracahe.

⁹ Ndayasecoãha-ãha tẽi chaveira yande Yar, inungar ahe yuvireco. Ipipe sui oyeyucapa uca mboi osuhusa pipe yuvireco.

10 Iyavei ndayande ñehe mara-mara tēi chira yande Aposar rese, inungar ahe ēgüe ehi yuvireco. Ipīpe sui Tūpa ombou güembiguai ava yucasar iva sui ahe ava yucapa āgua aracahe.

11 Co opacatu yande ramoī upe mbahe oime vahe aracahe icuachiapri yande ipa yaico vahe upe nara: “¡Peicua catu aipo nungar mbahe sui!” he āgua yandeu.

12 Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pīpe.

13 Pe recoāhasa rumo oyoya tupri ité ambuae ava recoāhasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoāhasa imbou pēu. Acoi mbahe tēi oimese pe recoāhase, Tūpa ombou voiñora pīratasa evocoi mbahe tēi sui pe sē āgua, chupe pe ñemosa āgua.

14 Sese che rivireta, che rembiaisu, peyepēi mbahe rahanga mboeteisa sui.

15 Ava niha peico pesenducua vaherā mbahe, evocoiyase peporandu co che remimombehugüer rese peyeupe icua tupri āgua.

16 Yaihuse uva ricuer sovasapri, “Aviye ndeu, che Yar” yande hesa pīpe, ahese oyoya guasu Cristo rese yaico suvī pīpe sui. Yahuse co pan imboyaho-yahopri, ahese oyoya guasu yaipisi Cristo retecuer yandeyeupe nara.

17 Yepe yande reta yaico viña, opacatu rumo yahu ñepēi pan sui. Sese yande ñepēi vahe ité yaico.

18 Peyapisaca acoi ava aracahendar Israel recocuer rese. Esepia, acoi yuvirohu vahe Tūpa

upendar mbahe seropovēhepri, ahe evocoyase chupendar ité yuvirecoi.

¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavēhepri mbahe rahanga upe, aviye catu ité” ndahei avei.

²⁰ Co rumo, acoi ava ndoicuai vahe Tūpa oicuavēhe mbahe carugar upe tēi yuvireco yepi. Ndahei rumo Tūpa upe nara ité ēgüe ehi yuvireco. Che evocoyase ndaipotai eté carugar upe nara tēi ēgüe peye vaheṛā peico.

²¹ Peihuse rumo yande Yar upendar igua, ndiyai peihu avei carugar upendar igua; iyavei pehuse yande Yar upendar mbahe, ndiyai avei pehu carugar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande re-cosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgüe ehi eté niha, ndahei rumo opacatu aviye, ndahei avei co opacatu mbahe yande pītivi catu Cristo rese yande reco āgua.

²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pīhañemoñetasa momaraēhi āgua.

²⁶ Esepia, ivi opacatu ipor reseve, ahe yande Yar upendar.

27 Acoi Tūpa reroyasarēhi pe soho ucase oyepiri pe mbocaru āgua, peso potase ipiri, pehuñora mbahe imbouprī pēu. Ndapeporandui chira rumo sese chupe Tūpa rese pe pīhañemoñetasa momaraēhi āgua.

28 Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgüe peyera pēu imombehusar rereco meguaēhi āgua, ava pīhañemoñetasa momaraēhi āgua avei.

29 Supi eté che añehe co ambuae ava pīhañemoñetasa rese, ndahei pe pīhañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava pīha rupi?” ehi vahe.

30 Iyavei aipo ehira no: “ ‘Aviye ndeu’ ahese Tūpa upe mbahe ahu vahe rese, ¿mahera pīha che reroñora yuvireco ahuse viña?” ehira.

31 Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pīpe.

32 Supi eté ndapemboyecuai chira pe recocueraí, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei.

33 Che opacatu che rembiapo pīpe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

1 Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

2 Che rivireta, che, “Aviye ité yuvirecoi” ahe pëu yepi che rese pemahenduha vïtese iyavei peguataño vïtese che opombohe vahe agüer rupi.

3 Che rumo aicua uca tupri pota pëu, Cristo niha secoi ñepi-peï cuimbahe cuaisar, cuimbahe evocoyase güembireco cuaisar secoi. Ëgüe ehi avei Tüpa Guahir Cristo upe.

4 Acoi cuimbahe Cristo upe ñemonuhasave oãca ndïru ndosequiise oyerure ãgua, anise Tüpa Ñehengagüer mombehu ãgua, ahe ëgüe ehi güerecuar Cristo mboeteiëhisa pipe.

5 Iyavei acoi cuña ndoyopiise oãca oyerوقي ãgua, anise Tüpa Ñehengagüer mombehu ãgua, ahe ëgüe ehi omer mboyeroyaëhisa pipe. Ahe cuña evocoyase ndoyavii oñeapipa tupri vahe.

6 Acoi cuña ndoyopi potaise oãca, tayapecãraisa tupri. Ochïse rumo oapecãrai ãgua, evocoyase toyopiño oãca sereco.

7 Cuimbahe rumo ndoyopi chira oãca sereco. Esepia, ahe Tüpa rahanga ité secoi iyavei ipo-rañetesa omboyecua ité oyese. Cuña rumo omboyecua omer recocuer oyese yuvireco.

8 Esepia, Tüpa oyapose cuimbahe, ndahei cuña sui vïnose, cuimbahe sui niha cuña oyapo.

9 Iyavei ndahei cuña upe nara Tüpa oyapo cuimbahe, ahe rumo oyapo cuña cuimbahe upe nara.

10 Co rese cuña virecora oãcapisa omer mboyeroyasa mboyecua ãgua omahese Tũpa rembiguai eta yuvireco sese.

11 Yande, yande Yar reroyasar yaico vahe co tecocuer rese, yañepitivii oyoya yaico. Evo-coiyase cuimbahe ndoicatu cuña porẽhi; cuña avei ndoicatu cuimbahe porẽhi yuvireco.

12 Esepia, yepe supi eté cuimbahe sui yapopri cuña. Ipare rumo cuña sui oha cuimbahe; opacatu rumo oyoya Tũpa suindar yuvirecoi.

13 Evocoiyase peyapisaca tupri co rese: ¿Iya pĩha cuña noñeacapii vahe oyerure Tũpa upe?

14 Yande ité yaicua yemochisa cuimbahe oyemboha vucuse.

15 Cuña rumo oviharete oha vucu porañetesa rese. Esepia, chupe imondopri ité ñacapi ãgua.

16 Acoi ava iñehe-ñehe tẽi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ãgũe ehi avei yuvireco.

Yande Yar rese yemomahenduha raisa

17 Co ambuae mbahe rese rumo ndaicutu eté, “Aviye tupri yuvirecoi” che he ãgua pẽu. Esepia, aipo pe ñemonuhasave, mbahe tẽi eté aipo peyapo.

18 Esepia, yipindar che ayandu peñemonuhapase aipo oyese yande Yar mboetei ãgua pe pihañemoñetasa ndahoyoyai pipe peico. Amove ayanduse pe rerãcua, aroya ité.

19 ¡Iya ité revo pihañemoñetasa ndahoyoyai vahe reime ãgua pe pãhuve Jesús reroyasar supi tupri vahe cua tupri ãgua!

20 Peñemonuhase pe pihañemoñetasa ndahoyoyai vahe pĩpe pe caru ãgua, ndahei yande Yar rese pe yemomahenduhaseve ãgüe peye.

21 Espia, aipo pecaruse, pe rane aipo pepoyava pecaru. Ambuae aipo evocoyase ndasiẽpoi tẽi yuvireco; ambuae rumo pe pãhu pendar aipo oyembosavaipõno yuvireco.

22 Pereco niha pe rẽta aheve pe caru ãgua iyavei pe ihu ãgua. Pe rumo pe reco pĩpe opa peroĩro ambuae Jesús reroyasareta peico. Ipĩpe avei pemochi ava ndovirecoi vahe mbahe. ¡Che evocoyase, “Aviye yuvireco” ndahei chietera co mbahe pe rembiapo ai rese pẽu!

Yande Yar rese yemomahenduhasa supi ité vahe resendar

23 Co ñehesa aipisi vahe yande Yar suindar amombehu vahe pẽu: ahe pĩtu pĩpe acoi Jesús mboguaisar opisi ãgua renonde, ahe oipisi pan.

24 “Aviye ndeu” ohe pare Vu upe, ombohimbohi, ahese aipo ehi gũemimbohe eta upe: “Co che rete amondo vahe manosave mbahe tupri pe reco ãgua. ãgüe peyera che rese pe mahenduhasa pĩpe peico” ehi.

25 ãgüe ehi avei ocarure yuvireco, ahe oipisi igua riru aipo ehi: “Co uva ricuer omboyecua pẽu Tũpa oyapora mbahe ipiasu vahe pe recorã. Che ruvi pĩpe rumo yaposara. Evocoyase co ari pĩpe suive peihuse co, peyemomahenduhara che rese yepi” ehi.

26 Esepia, acoi pehuse co, peihuse avei, peyemomahenduhara, pemombehu aveira yande Yar

mano agüer opacatu ava upe peico. Ëgüe peyera iyevi rãro peico.

Mara yahera yande Yar rese yayemomahenduhase

²⁷ Evocoyase acoi ava ocaruño tõi vahe, yuviroihuño tõi vahe avei Yar mboeteiëhisave, ahe evocoyase nomboetei yuvireco yande Yar rembiapocuer omondose güetecuer, iyavei oipiyerese vuvi.

²⁸ Sese tipihanemoñeta rane oyacatu güecocuer rese ava co pan hu água renonde, oihu água renonde avei co uva ricuer yuvireco.

²⁹ Esepia, acoi pe yemomahenduhaëhisave co setecuer rese pehuse iyavei peihuse, ahese mbahe naporai vahe peseca peyeupe nara peico.

³⁰ Ichui niha setá pemaheasi, oime setá nipi-rata iri vahe avei pe pãhuve, oime avei omano vahe pe pãhu pendar.

³¹ Yande pihanemoñeta tuprise rumo yande reco água rese, yande Yar evocoyase nomoime chira mbahe tõi yandeu evocoiya yande recosa pipe.

³² Yande Yar rumo oicua yande rembiapo ai. Sese omoime mbahe tõi yandeu. Yande reco mohivi tupri água rumo ëgüe ehi yandeu, ndahei yande cañi água opacatu ava viroyasarëhi reseve.

³³ Sese, che rivireta, acoi peñemonuhase pe yemomahenduha água yande Yar rese, peñearo ranera oyoya guasu pe caru água.

³⁴ Acoi ava ndasiepoise yuvireco, tocaru rane güëtave. Ahese yuvirasose ñemonuhasave, ndipoi chira mbahe chupe. Iyavei che asose eipeve pe repia, opara ambuae mbahe amoingatu vicho pëu.

12

Mbahecuasa Tūpa Espiritu suindar

¹ Che riviřeta, che aicua uca pota pēu co mbahecuasa resendar ñepei-pei pēu Espiritu omondo vahe.

² Pe niha cūritei peicua tupri ité yipindar Tūpa rese peicoēhi viřese, peyembopa uca mbahe rahanga ēgüe ehi tēi, noñehei vahe upe peico.

³ Sese, che aipota peicua acoi ava iñehe mara Jesús upe ndahei Tūpa Espiritu pīratasa pipe ēgüe ehi. Iyavei ava ndoicatui chira, “¡Jesús che Yar secoi!” ohe āgua opīha pipe Espiritu Santo ndoviřecoise.

⁴ Oime setá ambuae-ae tēi mbahecuasa Espiritu suindar yande Jesús reroyasar yaico vahe upe nara, ahe Espiritu rumo ñepeiño ité imondosar secoi.

⁵ Setá mbahe avei oime mbahe yayapo vaherā yande Yar upe. Ahe yande Yar rumo ñepeiño ité secoi.

⁶ Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeiño ité secoi. Ahe oyapo opacatu co mbahe ñepei-pei yande rese.

⁷ Ahe omboyecua yande Espiritu rerecosa ñepei-pei yandeu opacatu yande reco tupri āgua.

⁸ Espiritu pīratasa pipe Tūpa omondo ñepei viřoyasar upe iñehe āgua aracuasa rese iyavei ambuae upe omondo iporombohe tupri catu āgua ombahecuasa pipe.

⁹ Ambuae upe evocoyase omondo oyese yeroya tupri catu āgua oEspiritu pipe sui avei. Iyavei

ambuae upe omondo opĩratasa imbaheasi vahe mbogüera ãgua.

¹⁰ Ambuae oipisi pĩratasa mbahe poromondiisa oyapo vaheřã yuvireco. Ahe ichui avei vireco ambuae ava omombehu vaheřã ñehesa Tũpa suindar yuvireco. Ambuae upe Tũpa omondo mbahecuasa espĩritu naporai vahe iyavei Espĩritu supi tupri vahe cua tupri ãgua. Ambuae evocoyase ichui avei oicatu ñehesa ndicuasai vahe Tũpa suindar pipe oñehe ãgua. Ahe ichui avei ambuae oicatu ahe ñehesa ndicuasai vahe mombehu tupri ãgua ava upe.

¹¹ Ëgüe ehi Espĩritu ñepeĩño ité güemimbotar rupi omondo ñepeipei yande Jesús reroyasar yaico vahe upe co mbahecuasa.

Opacatu Cristo rese yaico vahe ñepeĩño ité yande recocuer

¹² Inungar yande retecuer resendar setá mbahe oime viña, ahe rumo ñepeĩño ité; Ëgüe ehi avei Cristo.

¹³ Ëgüe yahe avei opacatu, yepe yande pãhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepeipei vahe nungar yande reco ãgua Espĩritu ñepeipei vahe pipe. Ahe ñepeipei Espĩritu avei opa yaipisi.

¹⁴ Supi eté yande rete resendar ndahei ñepeipei mbahe, setá rumo mbahe.

¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tẽi ndaseco iri chira yande rete rese.

16 Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese!

17 Esepia, opacatu tupri yande rete sesa pãve tēise, ndayasendui chietera evocoyase mbahe viña. Anise, yande rete yapisacuar pãve tēise, ndayasētui chietera evocoyase mbahe viña.

18 Tūpa rumo ñepeipei yande rese mbahe omondo senara rupi tupri güemimbotar rupi.

19 Yande opacatu ñepeia ava rete resendar nungar pãve tēise, ndahei evocoyase opacatu tupri ava rete nungar yaico.

20 Supi eté yepe setá mbahe yande rete rese, ñepeino ité rumo yande rete.

21 Iyavei que yande resa ndiyai aipo ehira yande po upe: “¡Nde ãgüe ere tēi vahe eico!”; anise que yande ãca avei, “¡Nde ãgüe ere tēi vahe eico!” ndehi chira yande pi upe.

22 Esepia, yande rete resendar mbahe aviye nipiratai vahe yandeu, ahe sese rumo yayeroya catu.

23 Iyavei yande rete rese mbahe ndayasaisu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboyecuai vahe ava rembiepiave, ahe yayopi tupri sereco.

24 Oime rumo ambuae yande rete resendar ndayayopi vaheerã. ãgüe ehi Tūpa yande rete resendar mbahe imoingatu tupri. Evocoyase yande rete resendar mbahe ndayasaisu tuprii vahe imboeteipri catu secoi.

25 Tipo eme pihañemoñetasa ndoyoyai vahe pe

pãhuve. Oyoya pehañeco tupri ñepei-peï peyese peico.

²⁶ Evocoiyase que ñepei yande pãhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ëgüe peye ité ñepei-peï chupendar ité peico.

²⁸ Ëgüe ehi Tũpa iporavo viroyasar pãhuve, “Toime rane yipindar apóstol; ipare toime ava che ñehengagüer mombehu ãgua, ichui ambuae upe iporombohe ãgua, ipare ambuae mbahe ndayasepiai vahe apo ãgua, iyavei ambuae ava imbaheasi vahe mbogüera ãgua, ambuae ava pĩtiviisar tasecoi, ambuae ava recocuer reroguata tupri ãgua tasecoi, ambuae ava evocoiyase toñehe ñehesa ndicuasai vahe pipe” ehi.

²⁹ Ndahei rumo opacatu ava apóstol yuvirecoi, iyavei ndahei opacatu Tũpa ñehe mombehusar yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiai vahe yuvireco,

³⁰ ndahei opacatu vireco pĩratasa oporombogüera ãgua yuvireco, iyavei ndahei opacatu ndicuasai vahe ñehesa Espĩritu suindar pipe oñehe yuvireco, ndaopacatui avei oicua evocoi ñehesa renducua uca ãgua ambuae ava upe yuvireco.

³¹ Peseca ru Espĩritu suindar mbahecuasa aviye catu vahe peyeupe nara.

Yembohesa yande poroaisu ãgua resendar

Che rumo amombehura tecocuer aviye catu vahe pẽu.

13

¹ Yepe yande yañeheño tēise ambuae ava ñehe ndayaicuai vahe pīpe, iyavei Tūpa rembiguai ñehe pīpe avei viña, ndayasaisuise rumo ava ipīpe, yande evocoyase ēgüe yahe tupri tēi inungar mbahe guarepochi apopri siapū iteanga vahe, iyavei inungar acoi platillo siapū rai tēi vahe, ēgüe yahe tēi yaico.

² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pīpe yarosirira ivitri guasu senda sui viña, ndayasaisuise rumo ava ipīpe, yande evocoyase ēgüe yahe tupri tēira yaico.

³ Iyavei yande mbahe opacatu yareco vahe yamboyaho-yaho tupri tēise ava iparaisu vahe upe viña, iyavei yayoapi ucapa tupri tēise viña, ndayasaisuise rumo ava ipīpe yaico, ndayande pītivii eté evocoyia yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté,

⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe.

⁶ Ndahei mbahe tēi rese oyembovīha; ahe rumo oyembovīha mbahe supī tupri vahe rese.

⁷ Oporoaisusa virecose oñemosañō opacatu uve, oyeroya vite sese, osāro vite mbahe tupri ichui,

iyavei seco mbegüe viteño chupe.

⁸ Poroaisusa niha ndopai vahe ité. Oyepotara arí ipapapri coiye, ahese ndayamombehu iri chira Tũpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuasa.

⁹ Esepia niha, yaicua raimi tēi mbahe iyavei chĩhi raimi tēi yamombehu Tũpa Ñehengagüer.

¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chĩhivahe vite yande recose, yañehe, yandepihañemoñeta, yasenducua mbahe chĩhivahe nungar; yacuacuase ité rumo cute, yaseyapa chĩhivahe yande reco agüer.

¹² Cũritei yande ndayasenducua tuprii Tũpa re-sendar mbahe, inungar acoi yepiasa pipe yasepia hãvomi tēi que mbahe; oyeovai eté yaicose rumo, yasenducua tupri catu itera mbahe evocoiyase. Cũritei rumo yaicua raimi tēi mbahe Tũpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapí mbahe ndopai vaheerã, ahe: Tũpa rese yande yeroyasa, mbahe yande remiaro ivave oime vahe iyavei yande yeaisusa; co imombosapísa rumo avíye catú vahe ité ambuae sui yandeu, ahe yeaisusa.

14

*Yaseca catura Tũpa suindar ñehesa mombehu
ãgua*

¹ Peseca catu pe yeaisu tupri ãgua peico; aheseve avei peipotara mbahecuasa Tũpa Espĩritu remimbou. Ichuindar ñehesa mombehu ãgua rese catu ite rumo peicora.

² Esepia, acoi ava oñehe vahe ñehesa ndayaicuai vahe pipe, Tũpa upe ite evocoyase oñehe; ndahei ava upe teĩ oñehe. Esepia, ndipoi ete ava iñehe renducapar. Ahe rumo oñehe mbahe ndicuasai vahe rese oespĩritu pipe.

³ Acoi ava omombehu vahe rumo Tũpa suindar ñehesa yasenducua vahe pipe, ahe oipĩtivii ambuae ava Tũpa rese iyeroya ãgua, oporomonguerẽhi catu, oporombovĩha catu avei.

⁴ Acoi ava oñehe vahe rumo ñehesa ndayaicuai vahe pipe, ahe ae teĩ vireco catu Tũpa rese oipĩhañemoñetasa. Acoi ava omombehu vahe rumo Tũpa suindar ñehesa icuapri ite, ahe ombopĩhañemoñetá catu Tũpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pipe pẽu viña, aviye catu rumo pemombehura Tũpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri ãgua, ahese aviyeño oñehe Jesús reroyasar rovaque. Ipipe sui ipĩhañemoñeta catura Tũpa rese yuvireco.

⁶ Sese, che rivireta, asose pe repia, añehese co ñehesa ndayaicuai vahe pipe pẽu, ndapesenducuai chira che ñehe viña. Amombehuse rumo Tũpa oicua uca vahe cheu que mbahecuasa supi tupri vahe resendar, anise que ñehesa Tũpa suindar,

anise que ambuae porombohesa, ahese pesenducua ra viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehögüer yuvireco, ndayasenducuai eté evocoyase mbahe-mbahe sapucaisa osãha yuvireco.

⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoingatu voi vahe rã ovava ãgua viña.

⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoyase osenduño tẽi, ndosenducuai eté rumo pe ñehe yuvireco. ¡Evocoyase peñehẽño tẽi eté!

¹⁰ Supi eté, setá iteanga co ivi pipe oime ambuae-ae tẽi ava ñehesa. Oime avei rumo ava osenducua vahe aipo nungar ñehesa.

¹¹ Acoi ndayasenducuaise rumo ambuae ava ñehe, yande evocoyase inungar ambuae tecua pendar tẽi yaico vahe chupe; yandeu avei evocoyase ahe ava inungar ambuae tecua pendar tẽi yuvirecoi vahe.

¹² Pe niha peipota ité pereco vahe rã mbahecuasa Tũpa Espíritu suindar yepi. Sese peporandu catu mbahecuasa Espíritu suindar rese opacatu Jesús reroyasar pĩtĩvi ãgua Tũpa rese yuvirecoi tupri catu vahe rã.

¹³ Sese acoi ava oñehe vahe ñehesa ndayaicuai vahe pipe, toporandu rane Tũpa upe ambuae ava upe senducua uca tupri ãgua rese.

¹⁴ Esepia, acoi yayeroquiño tẽise Tũpa upe ñehesa ndayasenducuai vahe pipe, yayeroqui

yande espíritu pipe, ndayasenducuai rumo yande yeroqui.

¹⁵ ¿Mara yahera vo evocoyase? Yayeroquirá yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no.

¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco.

¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitivii chietera Tūpa rese imbopihañemoñeta catu ãgua senducuaēhi pipe.

¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui.

¹⁹ Jesús reroyasar ñemonuhasave rumo aipota catu amombehu vaheerã moviromi tēi ñehesa yasenducua vahe ava mbohe ãgua setá ñehesa ndicuasai vahe pipe che ñehe rãgüer sui.

²⁰ Che rivireta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahe catuñora rumo peico mbahe naporai vahe apoēhi ãgua.

²¹ Porocuaíta resendar icuachiapri aracaheendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara ñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe.

²² Evocoiyase co ñehesa ndayaicuai vahe pīpe oñehese ava Tūpa pīratasa pīpe, ahe Jesús reroyasarēhi yuvirecoi vahe upe nara: “¡Peicua catu, co supi tupri vahe!” he āgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducuapri yamombehuse rumo, ahe, “Co supi tupri vahe” he āgua Jesús reroyasar yuvirecoi vahe upe; ndahei ava seroyasarēhi yuvirecoi vahe upendar.

²³ Evocoiyase, acoi opacatu pe Jesús reroyasar pe ñemonuhasave oyoya guasu peñehese ñehesa ndayaicuai vahe pīpe tēi, ipare yuviroiquese pe pāhuve Jesús reroyasarēhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu.

²⁴ Opacatu rumo peñehese Tūpa suindar ñehesa yasenducua vahe pīpe, yuviroiquese evocoi nungar ava yuviraso pe pāhuve, ahe ae evocoiyase, “Supi eté ayavi che recocuer Tūpa rovaque” ehira pe ñehere renduse yuvireco.

²⁵ Ëgüe ehira opīhañemoñeta rai ndoyecuai vahe imboporēhipa uca oyeupe pe ñehere rendu ramosa yuvireco. Ipīpe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rivireta, peñemonuhase, oime pe pāhu pendar osapucui pota vahe sapucaisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota ava upe

mhahe oyeupe omboyecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mhahe yayapora ambuae Jesús reroyasareta seroya catu ãgua yuvireco.

²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepeipei rupi; ñepeipei evocoyase osenducua ucara iñehe ava upe oico.

²⁸ Acoi ndipoise ité rumo ambuae ava ahe ñehesa ndayaicuai vahe renducua uca ãgua, ndiyai ahe oñehera yuvireco pe ñemonuhasave; oyeupeñomi evocoyase ahe oñehera ipipe yuvireco Tūpa upe.

²⁹ Ëgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoyase pe pãhu pendar oyapisaca tuprira sese yuvireco ‘¿supi eté pãha?’ ohesave.

³⁰ Que ñepeipei oñehe vitesese Tūpa oicua ucasa mhahe ambuae ava upe, topituhuño yipindar oñehe vahe, ambuae evocoyase toñehe pëu.

³¹ Evocoyase ëgüe peyera peñehe ñepeipei opacatu ambuae osendu vahe mbohe ãgua iyavei imonguerëhi catu ãgua.

³² Acoi omombehu vahe ñehesa Tūpa suindar, ahe oicatu oñehe mombituhu ãgua.

³³⁻³⁴ Esepia, Tūpa seci mhahe aviye vahe aposar, ndahei ndoyembohe catui vahe.

Ndiyai cuña upe iñehe ãgua pe ñemonuhasave. Esepia, ëgüe ehi avei opacatu ambuae Jesús reroyasar ñemonuhasa rupi yuvireco. Evocoyase ndiyai

eté aheve iñehe ãgua yuvireco chupe. Iyacatu rumo ahe imboyeroyapri yuvirecoira omer upe Tũpa porocuita rupi.

³⁵ Oicua potase que mbahe, iya omer upe oporandura güetave yuvireco. Esepia, cuña upe ndiyai eté iporandu ãgua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tũpa Ñehengagüer ava upe peico, ndahei avei pẽuñomi ou Tũpa suindar ñehesa.

³⁷ Acoi que pe pãhuve oimese “che Tũpa Ñehengagüer mombehusar aico” ehiño tẽi vahe, anise que “aicua Espiritu suindar mbahe” ehi vahe, iya rumo oicua tupri co aicuachía vahe imondo pẽu, ahe yande Yar porocuita resendar.

³⁸ Ahe ndoyapisaca potaise rumo che ñehe rese, iñehe rese evocoyase ndapeyapisacai chira.

³⁹ Sese, che rivireta, peyemonguerẽhi catu Tũpa suindar ñehesa icuapri vahe mombehu ãgua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe ãgua.

⁴⁰ Peyapora rumo opacatu mbahe ñepeipei-peipei cuaita rupi mbahe tupri pipe.

15

Cristo cuerayevi agüer

¹ Che rivireta, che aipota peyemomahenduha acoi ñehesa pĩsirosa resendar pẽu mombehu vahecuer rese. Co ñehesa niha peĩpisi. Ipĩpe sui avei niha peyemoviracua peyese.

² Seroya pipe niha peñepisiro peico peyemoviracuase sese. Ëgüe ndapeyeise rumo, peroya tupri tēi.

³ Acoi ñehesa aipisi vahe, opa uca aicua pēu. Esepia, ahe aviye catu vahe: Cristo omano yande angaipa repirã Tūpa Ñehengagüer icuachiapri rupi eté

⁴ iyavei oñoti sehōgüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei.

⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe.

⁶ Ichui oyemboyecua quiniento sui setá catu vahe viroyasar upe. Evocoyase oyoya guasu osepia yuvireco. Setá vite rumo sepiasarer yuvirecove vite cūrítei; amove rumo ambuae opa omano yuvireco.

⁷ Coiye oyemoporēhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviye evocoyase che ipá oha vahe aico seroya ãgua.

⁹ Esepia, che seco ivi coti catu vahe opacatu ambuae apóstol sui aico. Iyavei ndacheãroi eté apóstol che reco ãgua viña. Esepia, che yipindar seroyasar aseca-seca catu vahe mara-mara tēi sereco ãgua.

¹⁰ Che rumo apóstol ité aico. Esepia, Tūpa oyapo mbahe aviye vahe ité cheu; che rovasa oico. Evocoyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi Ëgüe ahe vichico, Tūpa rumo oporovasasa pipe secoi che rupi.

¹¹ Ndapepihañemoñetai chira rumo acoi oporaviqui catu vahe rese tēi. Co ñehesa Cristo

recouer resendar ore oromombehu vahe rese rumo pepihañemoñeta catura. Esepia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pëu. Oime rumo amove pe pãhu pendar, “¿Mahera aipo ocuerayevira omano vahe yuvireco viña?” ehiño yuvireco.

¹³ Ndocuerayevise ité rumo ava omano vahe viña, Cristo avei evocoyase ndocuerayevii chietera viña;

¹⁴ iyavei Cristo ndocuerayevise viña, ore secouer oromombehu vahe evocoyase ëgüe ehi tēi etera viña. Iyavei pe yeroyasa Cristo rese ëgüe ehi tēi aveira viña.

¹⁵ Acoi ëgüe ehise ité rumo viña, ore avei evocoyase oroñeheno tēi etera Tūpa resendar ñehesa rese oroico viña. Esepia, “Tūpa Cristo ombogüerayevi” orohe ité imombehu ava upe oroico. Ndocuerayevise ité rumo omano vahe yuvireco viña, ahese Tūpa nombogüerayevii chiaveira Cristo viña.

¹⁶ Ëgüe ehi eté, acoi omano vahe ndocuerayevise yuvireco viña, Cristo avei evocoyase ndocuerayevii chietera viña;

¹⁷ Tūpa rese pe yeroyasa evocoyase ëgüe ehi tēi vahe itera viña; angaipa pipe viteño tēi evocoyase pe recouer viña.

¹⁸ Iyavei acoi ëgüe ehise ité viña, evocoyase omano vahe Cristo reroyasar, ahe avei ocañi tēira viña.

19 Ndipoise yasãro vaherã Cristo suindar mbahe yamanose, yande evocoyase imbopapri tẽi catu itera yaico opacatu ambuae ava sui yuvireco viña.

20 Cristo rumo supi eté ocuerayevĩ omano vahe pãhu sui; ahe rane yipindar ocuerayevĩ vahe.

21 Esepia, ñepei ava rembiapo sui oime manosa yandeu. Evocoyase ñepei ava rembiapo sui avei yacuerayevira.

22 Esepia, inungar acoi Adán rembiapo ai sui ava opacatu omano yuvireco, ãgüe ehi aveira Cristo rembiapo sui opacatu ava sese yuvirecoi vahe virecorã tecovesã yuvireco.

23 Ñepei-pei yandeu imombehusa rupi; yipindar Cristo ocuerayevĩ, ichui yande seroyasar yaico vahe yacuerayevĩ aveira sese acoi ahe oyevisse curi.

24 Ahese oura arĩ ipa vahe cute. Yipindar rumo Cristo omocañipara opacatu seco pĩrata ãgüe ehi tẽi vahe. Ipare omondora opovrĩ pendar Vu Tũpa upe.

25 Ahe rane ité rumo opacatu oporocuirã oico acoi Tu opase voi eté omondo opacatu yamotarẽhimbar ipovrive.

26 Ahese ipa manosa opa itera.

27 Esepia, Tũpa osecopi opacatu mbahe imondo ipovrive, “Opacatu ité mbahe secopipri” ehise. Ndahei rumo Tu Tũpa avei secoi ipovrive. Esepia, Tu ité opacatu mbahe osecopi imondo ipovrive.

28 Evocoyase, opase mbahe imondosa ipovrive, ahe ae evocoyase oyemondora Vu Tũpa povrive. Tu evocoyase secoira ivate catu vahe opacatu mbahe sui.

29 Ndipoise omano vahe cuerayevĩ ãgua

yuvireco viña, ¿mbahe rese pñha evocoyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayevise yuvireco viña, ¿mahera ru evocoyase ahe ava oñeapiramo uca chupe yuvireco?

³⁰ Iyavei ore no, ¿mahera ru evocoyase oroye-mondora mbahe tēi upe ari rupi viña?

³¹ Supi eté, che rivireta, ari yacatu aviye che amano vahe rã opacatu co mbahe tēi sui. Ahe piveve avei rumo che areco ité che viharetesa pe rese yande Yar Jesucristo rese che recose.

³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoi nungar ava upe peico. Supi eté ñehesa aipo ehi vahe: “Ava naporai vahe piri peicose, ahe evocoyase virovara pe reco tupri” ehi vahe.

³⁴ Pepihañemoñeta tupri iri, peyemboangaipa uca iri eme. Esepia, amove pe pãhu pendar oime ndoicuai vahe ité Tũpa yuvireco. Che aipo ahe ité pẽu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyeteramo pe pãhu pendar oimera oporandu vahe: “¿Mara ehira pñha omano vahe ocuer-

ayevî irise yuvîreco coiye? ¿Mara ehi angahura pîha setecuer ahese yuvîreco?" ehira yuvîreco oyeupe.

³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sorî āgua.

³⁷ Yañotise mbahe, sāhii rane ité yañoti; ndahei ihî opacatu reseve yañoti.

³⁸ Ipare rumo Tūpa omondo ahe mbahe rāhii upe ihîguā güemimbotar rupi, iyavei ambuae mbahe rāhii yacatu omondo ihîguā.

³⁹ Ndahoyoyai rumo que ñepeî mbahe mitî hi ambuae mbahe mitî hi rese. Ëgüe yahe avei yande yaico vahe ambuae ité yande rete mbahe mîmba sui; vîrai rete ambuae ité iyavei pira rete ambuae tēi no.

⁴⁰ Ëgüe ehi avei niha, oime îva pendar rete, îvîve ava yuvîrecoî vahe rete avei no. İva pendar rete catuprîgüer rumo ndahoyoyai eté îvî pipendar rete rese.

⁴¹ Ari rendîgüer avei ndahoyoyai yasi rendîgüer rese, yasîtata rendîgüer rese avei. Ñepeî yasîtata ambuae yasîtata rese ndahoyoyai avei sendîgüer yuvîreco.

⁴² Ëgüe ehi aveira niha omano vahe cuer-ayevisa; yañotise sehōgüer, ahe ituyu vahe rā. Ocuerayevisa rumo ndituyu iri chietera; apîrēhi vahe rā ité secoira.

⁴³ Tehōgüer ñotimbrî nimomburusai vahe; coiye ocuerayevisa rumo, imboeteiprî ité secoi. Acoi ava rehōgüer oñoti vahe yuvîreco, nipirata iri eté oico, coiye ocuerayevisa rumo, ipîrata îtera.

⁴⁴ Supi eté, acoi ava rehōgüer ñotisa vahe, ahe co îvî pipendar tēi setecuer. Ocuerayevisa rumo,

setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: “Yipindar ava Adán serer vahe. Ahe sete upe ombou Tūpa secove āgua co ivi pipe” ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou āgua.

⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu.

⁴⁷ Ēgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evo-coiyase iva pendar.

⁴⁸ Inungar yipindar ava ivi suindar, Ēgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, Ēgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cūritei Adán nungar tupri yaico; Ēgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pēu: acoi ava upe gūetecuer reseve, ndiyai eté seique āgua ivave Tūpa mborerecuasave. Esepia, co yande rete ocañi tēi vaherā, ndoipisi chira tecocuer apirēhi vahe.

⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tēi eté secuñarosapara.

⁵² Mimbī moñehese voi yande resapihara inungar yande resapiqui vahe, Ēgüe ehira secuñarosapa

yande rete. Aheseve avei omano vahe ocuer-ayevipara apirēhi vaherã ité yuvireco; yande evocoyase nayamano vītei vahe, opaño tēira yande rete secuñarosa.

⁵³ Esepia, co yande rete ocañi tēi vaherã, ahe yande rete niha opara oñecuñaro apirēhi vaherã yuvireco.

⁵⁴ Ēgüe ehise yandeu, ahese ramo osupitira Tūpa ñehe icuachiapri pīpe imombehupri yandeu curi: “Manosa opara imocañisa” ehi vahe.

⁵⁵ Iyavei aipo ehi: “Ndayasiquiye iri chira yande mano āgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui” ehi.

⁵⁶ Angaipa niha inungar mbahe popiar omoime vahe manosa yandeu. Moisés porocuita arachendar evocoyase ombou pīratasa angaipa upe angaipa aposar mocañi uca āgua.

⁵⁷ Che rumo, “¡Aviye ndeu!” ahe Tūpa upe. Esepia, ahe ombou angaipa recopi āgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepia, peicua niha yande Yar rese peicose, pe poraviquisa ndahei ēgüe ehi tēi vahe.

16

Porerecosa Jesús reroyasar pītivī āgua resendar

¹ Iyavei co guarepochi monuha āgua iparaisu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe.

² Domingu yacatu iya pe avei peipeha voimi guarepochi peico pe poraviqui repri sui yapocatu água. Eipeve che yepotase, ndapeyemañeco iri chira guarepochi monuha água rese peico.

³ Evocoyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso água yuvireco ahe pendar yuvirecoi vahe upe.

⁴ Aviyeteramo, iyase cheu, che avei asora aheve. Evocoyase ahe yuvirasora che rupi.

Pablo ipihañemoñeta oguata água rese

⁵ Che sose, asora ivi Macedonia rupi, ipare asora pe repia Corinto ve.

⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che pñiviniñomira peye eipeve sui ambuae tecuave che so água rese.

⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri.

⁸ Che rumo cūritei apitaño vitera cohava Efeso ve, asepia ranera Pentecostés pieta.

⁹ Esepia, oime ité yande Yar upe che poraviquisa aviye vahe ité cohava, yepe setá iteanga ava che amotarēhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pāhuve. Esepia, ahe avei oporaviqui yande Yar upe nara oico che nungar.

¹¹ Tipo eme ñepei yepe sepia potaēhisar yuvireco, iya rumo peipñitivii catura che piri iyepota tupri água rese. Esepia, che iyavei ambuae

Jesús reroyasar rese orosãro ité iyepota ãgua oroico.

12 Yande rivri Apolos upe, “Eso ambuae Jesús reroyasar piri Corinto ve” ahe tēi. Cũritei rumo niqerēhi oso pe repia; iyase chupe, ahese osora pe piri.

Pablo mahenduhasa ipa vahe

13 Pemahemoha peyese; peyemoviracua avei Jesús rese pe yeroyasa pipe. Peñemosãño catu pe cuaita upe. Peicoveño itera Tũpa pĩratasa pipe.

14 Opacatu mbahe peyapo pota vahe, peyapora pe poroaisusa pipe ité.

15 Che rivireta, pe peicua Estéfanos opacatu güēta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri ãgua yuvireco no.

16 Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporaviqui vahe rese avei.

17 Pe pãhu pendar Estéfanos, Fortunato iyavei Acaico cohava oyepotase che mbovha yuvireco. Esepia, ahe oyapo ité pe ndapeicatu tupri vahe apo yuvireco.

18 Ahe che monguerēhi catu yuvireco, ēgüe ehi avei revo pēu no. Pemboeteira evocoi nungar ava peico.

19 Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sētave

yuvireco, ahe avei ombou omahenduhasa yande Yar rer pipe yuvireco pẽu.

²⁰ Opacatu Jesús reroyasar coha pendar avei omondo omahenduhasa yuvireco pẽu. Peyevaupite catu pe reco maranehisa pipe ahe mahenduhasa mombehu peyeupe pe viharetsave.

²¹ Che Pablo, che po pipe ité aicuachía co che mahenduhasa imondo pẽu.

²² Acoi ava ndosaisui vahe yande Yar Jesucristo, ahe tocañi mbahe tẽi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi.

²⁴ Pẽu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pẽu.

Tũpa Ñehengagüer
New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files
dated 29 Jan 2022

c27c2d97-c359-59f5-b367-83efb2e33739